

共同經課 - 1 使徒行傳九章一節~六節, 七節~二十節

1 掃羅 iáu-kú 一味 háng-hoah ài thài 主 ê 學生, 去見祭司頭, 2 tùi 伊求 phoe hō 大馬色 chiah-ê 會堂, 若 tú-tiòh thàn chit-ê 路 ê 人, 無論男女, 伊就 thang 縛 in, 帶到耶路撒冷。3 行近大馬色 ê 時, 忽然 tùi 天有光圍曩照伊; 4 伊就跋倒 tī 地裡, 聽見聲 kā 伊講, 掃羅, 掃羅, 啥事 khún-tiòk 我? 5 伊講, 主 ah, 你是 chī-chhui? 講, 我就是你所 khún-tiòk ê 耶穌。6 總是你 tiòh 起來入城, 你所應該做 ê beh kā 你講。7 同行 ê 人靜靜 khiā-teh, 聽見聲, 也無看見人。8 掃羅 tùi 地裡起來; 目睷 thī 開, boē 看見甚麼; 人牽伊 ê 手, chhoā 伊入大馬色。9 歷過三日 boē 看見, 無食也無 lim。10 Tī 大馬色有一個學生名亞拿尼亞; 主 tī 異象中 kā 伊講, 亞拿尼亞 ah。伊講, 主 ah, 我 tī chia。11 主對伊講, 起來, 去 hit 條街路叫做直 ê, tī 猶大 ê 家 chhē 大數人, 名掃羅; 因為伊 tú-tú teh 祈禱; 12 koh 有看見一人, 名亞拿尼亞, 入來, kā 伊按手, hō 伊能看見。13 但是亞拿尼亞應講, 主 ah, 我聽見 choē-choē 人講, chit 人 tī 耶路撒冷 bat 怎樣大 pháiⁿ 款待你 chiah-ê 聖徒; 14 koh 伊 tī chia 有 chiah-ê 祭司頭 ê 權, thang 來縛見若求叫你 ê 名 ê 人。15 獨獨主 kā 伊講, 做你去; 伊是我揀選 ê 器具, beh 報揚我 ê 名 tī 外邦, kap 國王, 以及以色列 kiaⁿ 孫 ê 面前; 16 我也 beh hō 伊知, 伊 tiòh 因為我 ê 名受 joā-choē ê 艱苦。17 亞拿尼亞就去, 入伊 ê 厝; 手 hoāⁿ 伊, 講, 兄弟掃羅, 主, 就是你來 ê 時路中出現 hō 你看 ê 耶穌, 差我來, hō 你能看見, koh 得 tiòh 聖神充滿。18 Liām-piⁿ 對伊 ê 目睷有物 ka-láuh, 親像魚鱗, 伊就看見; 起來受洗禮; 19 已經食就勇健。掃羅 kap 大馬色 ê 學生 saⁿ-kap toà kúi-nà 日。20 Liām-piⁿ tī chiah-ê 會堂宣傳耶穌, 講伊是上帝 ê kiáⁿ。

共同經課 - 2 詩篇三十篇

1 Chit-ê 詩是獻宮殿 ê 歌; 大衛做 ê。1) 耶和華 ah, 我 beh 尊重你做至高, 因為你 bat 提拔我, 無 hō 我 ê 仇讎對我誇口。2 耶和華我 ê 上帝 ah, 我 bat 求叫你, 你就醫好我。3 耶和華 ah, 你 bat 救我 ê 靈魂 tùi 陰間起來。你 hō 我活 teh, 免致入墓。4 耶和華聖 ê 百姓 ah, lín tiòh 唱歌 o-ló 伊, 記念伊 ê 聖名來感謝 I。5 因為伊 ê 受氣不過目 nih 久; 伊 ê 恩典是一生 ê 久; Kui 暝雖然有啼哭, 早起時就有歡喜。6 論到我, 我 tī 興通 ê 時就講, 我永 boē 搖 choah。7 耶和華 ah, 你 bat 施恩, hō 我 ê 山 khiā 在堅固, 你掩你 ê 面, 我就擎腹。8 耶和華 ah, 我求叫你; 我對耶和華求恩, 講, 9 我流血, 我入墓, 有啥利益? 塵埃 kiám 會 o-ló 你? kiám 會報揚你 ê 真實 mah? 10 耶和華 ah, 求你聽我, 憐憫我; 耶和華 ah, 求你幫贊我。11 你已經將我 ê 啼哭變做跳舞; 你將我 ê 麻衫 thng 去, 用歡喜 kā 我 há; 12 Thang hō 我 ê 心神唱歌, o-ló 你, 亦無靜靜。耶和華我 ê 上帝 ah, 我 beh 感謝你, 到永遠。

共同經課 - 3 啟示錄五章十一節~十四節

11 我 koh 看, 就聽見座位, kap 活物, kap 長老 ê 周圍 choē-choē 天使 ê 聲; in ê 額數千千萬萬; 12 大聲講, 受 thài ê 羊羔, 合宜得 tiòh 權能、富有、智慧、氣力、尊貴、榮光、o-ló。13 Koh 聽見 tī 天 tī 地, kap 地 ê 下面, kap 海面, 一切受造 ê 物, kap 其中凡所有 ê, lóng 講, O-ló、尊貴、榮光、權勢, lóng 歸 hō 坐 tī 座位 ê, kap 羊羔, 到代代無盡。14 四個活物講, À-bēng; hiah-ê 長老就仆 teh 拜。

共同經課 - 4 約翰福音二十一章一節~十九節

1 Chiah-ê tāi-chì 以後, 耶穌 tī Thê-pi-lī-a ê 海邊, koh 顯明家已 hō 學生看; 伊 ê 出現記 tī 下底。2 有西門彼得、多馬, 稱 Té-thó-má, 加利利 ê Ka-ná 人那但業, Se-pi-thài ê kiáⁿ, iáu 有學生兩個 lóng saⁿ-kap tī-teh。3 西門彼得 kā in 講, 我 beh 去討魚。In kā 伊講, 阮亦 beh kap 你去。就出去, 上船; hit 暝無掠 tiòh 麼。4 天 phú 光, 耶穌 khiā tī 海坪, 但是學生 m̄ 知伊是耶穌。5 耶穌就 kā in 講, 細 kiáⁿ ah, lín 有物配無? In 講, 無。6 伊就 kā in 講, 拋網 tī 船 ê chiáⁿ-pêng, 就會得 tiòh。In 拋落去, 就網拖 boē 起來, 是因為魚 choē ê 緣故。7 Tùi án-ni, 耶穌所疼 hit-ê 學生 kā 彼得講, 是主 lah。西門彼得一下聽見是主, 因為 thng-pak-theh 就用外衫來 há, 跳落海。8 其餘 ê 學生, (因為離坪無遠, 約略三十丈), 用細隻船來拖 hit 網 ê 魚。9 到上坪, 看見有 teh tòh ê 炭, 頂面有魚, koh 有餅。10 耶穌 kā in 講, Tú-á 拋 tiòh ê 魚, 掠幾尾來。11 西門彼得就起去, 拖網上坪, 有大尾魚滿滿, 共一百五十三尾; 魚雖然 hiah choē, 網亦無裂。12 耶穌 kā in 講, 來食早頓。學生無人敢問伊, 你是 chī-chhui? 因為知伊是主。13 耶穌到, thèh 餅 hō in, 魚亦是 án-ni。14 耶穌 tùi 死人中 koh 活了後, 出現 hō 伊 ê 學生看見, 這是第三 pái。15 已經食早頓, 耶穌 kā 西門彼得講, 約翰 ê kiáⁿ 西門, 你疼我 khah 贏 chiah-ê mah? 應講, 主 ah, 是; 你知我疼你。耶穌 kā 伊講, 飼我 ê 羊 á-kiáⁿ。16 第二 pái, koh kā 伊講, 約翰 ê kiáⁿ 西門, 你疼我 mah? 講, 主 ah, 是; 你知我疼你。耶穌 kā 伊講, 照顧我 ê 羊。17 第三 pái, kā 伊講, 約翰 ê kiáⁿ, 西門, 你疼我 mah? 彼得因為伊第三 pái kā 伊講, 你疼我 mah? 就憂悶, kā 伊講, 主, 你無所 m̄ 知; 你知我疼你。耶穌 kā 伊講, 飼我 ê 羊 á。18 我實實 kā 你講, 你少年 ê 時用帶家已縛, 照所 ài 來行遊; 獨獨到老, 你 beh 伸手, 別人就縛你, 拖你到 m̄-ài 去 ê 所在。19 耶穌講這話, 是指彼得 beh 怎樣死, 來榮光上帝。已經講 án-ni, 就 kā 伊講, Tè 我。